



蕉林詩藁序

詩必襲唐非也然離唐必儻善詩者必不

儻詩必貌漢魏亦非也然離漢魏必纖善

詩者必不肖纖夫不為纖必朴迺可朴又

近儻顧非儻之謂也不為儻必娟秀迺可

娟秀又近纖顧非纖之謂也予每持此意

讀近人詩稱意甚少暨與梁蒼巖先生同



佐中銓每藤陰日夕吏散人稀間談詩意
輒與微意有合請觀一二新篇抑又合更
探篋中秘本疊々讀之無不合矣乃歎曰
晉季札觀於周樂而歎鄭風之已細美唐
叔之後衰有以哉夫古人郊廟登歌朝會
燕饗殷懃贈答悉載之詩以謂感神人和
上下莫善於詩也後之人或稱其一義賦

其一辭而國之盛衰家之競弱人之貞淫
禍福莫不於是乎覘之是雖善鑒存乎覽
觀抑亦至心形諸載筆也夫然則舍春容
雅頌而學彼寒雞餓鵠冠幘而服婦人衣
其於詩也則謂之何蒼巖以盛季華胄擅
制作才久矣起艸明允握符樞密將以戡
定禍亂黼黻盛治為

國元臣其意計深遠矣空乎其吐音春容
雅頌且渢々多風一如此也其在今日倘
復有賦詩言志以繼古人之風者予其知
所宗稱矣

益都孫廷銓題



蕉林近稿

鎮陽梁清標著

民夫謠

朝來點鑿山令嚴如霜雪鳥道何巉巉千夫日流血
縣官騎驢去日昃無晨餐吾儕貧賤人安敢辭饑寒
驛卒謠

前驛聞官逃後驛傳馬死安得穆王八駿來絕塵一
日馳千里

古今行

古今疑真不疑假葉公獨好畫龍者脂粉紈綺傾人
城佳人自倚修竹下市上驕殺弄珠兒杜甫一錢囊
空垂華歆名與管寧金曾參投杼翻見疑嗚呼連城
之壁未足寶荆山抱璞將奚爲

豺虎行

豺虎腹飽麒麟饑太行驥子服鹽車牛有阜兮鷄有
埒枳棘會見鸞鳳棲仲尼不用杏壇老盜跖殺人翻
壽考少年亡賴千金裝銀鞍白馬邯鄲道君不見古
來戰伐秋今日爲羣盜明日封王侯賈生痛哭竟何

益楊雄著書終被收紛紛世事本如此諸君且歸酌
新篇

邯鄲少年行

邯鄲少年輕俠遊翩翩白馬金絡頭掉臂長揖五侯
宅調笑醉眠倡家樓鬪鷄場中名籍籍百萬呼盧輕
一擲夷門獨弔侯生墳座間常養田橫客秋水盈盈
拭寶刀意氣直比青雲高門外軒車碧油幕樽前絃
索紫檀槽一言相投許然諾黃金捐棄如鴻毛世態
紛紛何足數對面翻覆爲雲雨願學射獵逐少年沽

酒擊鮮傾肺腑安用讀書守蓬蒿
屈首偏仄羞兒曹
公無渡河
公無渡河河廣風浪高
行旅却步不敢進舟子招手
聲嘈嘈陽侯天吳爭跳舞中流
執楫人徒勞石巉巖
兮灘勢惡颶風吹沙湧萬壑
公無渡河前舟已傾覆
後舟旋盤渦螭螻如梁亘河岸
瞬息變化蛟龍多嗟
嗟公無渡河不如歸去栖山阿

行路難

行路難難如何高有矰繳
卑有羅罝猱跳梁當道立
川原紆曲石嗟峩車殆馬煩
日云暮我欲操舟阻洪
波阻洪波獨徬徨逡巡迷塗
祇自傷世人膠漆在富
貴酈呂刎頸終參商朱穆絕
交良有託楊朱灑泣非
荒唐我旣不能規方爲圓
驅拙爲巧胡不委心履周
行行路難君莫忘

爰居行

爰居厭鐘鼓鸚鵡思隴山麋鹿
自齧幽澗草野鶴志
在雲霄間人生榮瘁自有數
栖栖夜行胡不還豪客
張目肆彈射出門輒遭豎子罵
揮汗衣沾十丈塵日

吳舉箸食難下徘徊戀微祿何異蝸牛涎蛾眉入官
易見妬磬折向人若爲憐朝鳴玉珂暮得罪低頭上
簿心茫然君不見古人恥對刀筆吏丈夫意氣寧瓦
全十畝迎風新稻熟且自曳杖行村田

登盤山作

清曉發薊門盤山近在目引馬憑老僧迤邐迷磴曲
山根亂石橫澄泉瀉川麓古松勢蚪蟠春鳥鳴灌木
窈窕開佛樓僧徒隱石屋下馬坐高巖宛轉清陰覆
俯首瞰平原蒼莽極遙矚桃李媚幽谿烟臯布新綠

天風吹我裳拂拂來芳郁頓令塵慮消良覺素懷足
何事慕蓬丘采真徒僕僕徘徊不能歸長嘯振林谷

秋日

暑退天日晶秋光淨若洗小堂晝垂簾竹樹陰階砌
怪石立縱橫藥欄發芳芷杜門無雜賓晴暉明窓几
散書恣冥蒐悠然契深旨外物何足欣寵辱皆妄耳
蕭森儼空山婆婆忘城市急雨須臾來簷花落如綺
守官多愆尤鵜梁昔所耻安能作蝸牛升高不知止

達人貴知幾君子能俟命人生苦勞勞紛華疇戰勝
閒居懷古人蕭然寡營競皎皎明月光照我書幃靜
夜清星河垂庭幽花木靚謝客百慮忘適符麋鹿性
靜觀識盈虛慷慨發孤詠逝將驅車歸故園禾黍盛
寄語長鬚奴爲我除三徑

幽蘭歎

灼灼桃李花姿態一何穠向日倚檻開欣欣爭敷榮
遊騎時喧闐壺觴相對傾爛熳映一時沾醉意氣盈
嗟彼幽谷蘭寂寥挺孤英芳華聊自賞嚴霜任飄零

雨露豈有私托根實不同冷落雖足傷安敢移堅貞

階草吟

燁燁闌中葩萋萋階前草所處地雖同爭如花色好
主人愛華滋灌溉良足寶弱草值驕陽靡靡就枯槁
畦丁舍不顧微芳寧自保萬物本造化仁慈賴蒼昊
風雨歛然來英蕤凋零早階草自翩翩棄捐何足道

李園行

西直門外清泉流李園鉅麗甲皇州苑內潺湲疏碧
沼天際窈窕開朱樓錦堂繡幙列鐘鼎曲房密室鳴

筮篋成畹生當全盛世張筵招客多貴遊十五妖姬
伺後閣千金駉裏羅前頭珠履稱觴金鑿落牙檣載
酒木蘭舟勝賞四時歡不改花落花開春常在已分
風月爲主人豈料桑田變滄海予來繫馬門前樹寂
寂池塘鎖烟霧不見當年歌舞人春雨秋霜自朝暮
畫棟欹斜落燕巢菱荷零亂眠鷗鷺殷勤但見白髮
翁自言少小居園中主人華貴擁金穴爲園鉅萬泥
沙同奇石移來儼幽壑飛橋天矯如長虹芙蕖香滿
槐庭月水閣涼生楊柳風行樂幾時賓客散往事歛
淚如雨

臥雲草堂歌

鎮陽城西泉森森老槐千尺生晴杲窈窕竹嶼吟修
篁逶迤洲渚開芳沼灌木陰陰鳴鳥繁水田漠漠沙
鷗小白雲擁出大茂山我兄築堂雲之間覆茅補屋
河岸北繩床斐几圖書閒幅巾筇杖意瀟洒落花不

掃長閉關誰爲我兄作此圖圖中之人如可呼懸蘿
挂薜春草綠近人麋鹿當窓趨烟雨冥濛波欲動咫
尺彷彿成江湖又畫堂上松蟠曲倚怪石目送飛鴻
把道書疎樹颯颯長天碧小兒挾冊氣如虹雙鬟汲
泉生松風美人倚竹含笑立月明猿嘯空山中盧鴻
草堂輞川垞斯圖寫出將無同堂中冷然何所有淵
明自撫無絃琴陶侃數過隣家酒我兄生平慕采真
落筆烟霞歛在手鍊藥每守丹竈傍避喧欲共村翁
偶一從通籍縮朝紳歸心常戀雕丘陰垂釣一竿園
十畝草堂雖陋寧知貧他日功成拂衣去食芝獨臥
溪雲深君不見鹿門龐德公谷口鄭子真高名千載
誰與倫朱門華屋易銷歇此堂歲歲春風新

舟子行

晨驅東指通州路雉堞矗立生蒼霧萬家市井沸雲
烟城邊古岸維舟處四方袞袞咸朝宗漕艘賈舶不
知數春風澹蕩吹潞河水紋如篔簹與微波舟穩飄然
天上坐舟子結網依陂陀妻孥操作烟火起扣舷鳴
鳴聞漁歌中流舉網得鮮鯉賣錢沽酒蒼顏醅操舟

共道風濤惡誰知風濤陸地多我憂出門行路苦前
有毒蛇後猛虎蜀道青天古所歎奔走干戈窮杜甫
達官貴人不謀身千金之子多愁貧浮家泛宅何不
樂華屋往往飛黃塵

施長也草堂歌

施君吾友清且真爲郎出守東海濱歸來清風携兩
袖往往釜甑生埃塵仕宦十年猶矮屋掃除小圃疑
空谷結茅爲堂竹樹間疎畦仄徑呈新綠柴門晝閉
白日長豆棚風起菜根香北牖琴書有餘韻棊几木

榻生微涼此中幽人自高臥瞬息輒謂如羲皇客至
一童守茗竈欣然賓主時相忘布袍芒履君獨樂車
馬不聞驚鳥雀閒看浮雲數往來過雨簷花任開落
堂前種菊盈十畝坐摘菊英常在手漉酒欲效陶淵
明愛棋不減橘中叟中山陋室傳古今君子居之陋
何有施君施君學道似得靜中趣區區富貴寧足慕
苦避長安如畏途草堂彷彿桃源路余亦淡漠厭浮
名幾年羈勒憂樊籠聞君之堂不得見習習耳後來
輕風安得拂衣傍君住相對揮塵談虛空嗚呼世事

君知否急流身退真英雄

夏日漫興

退食門常閉攤書衆慮忘軒深炎暑避人靜午陰長
花氣侵帷細溪雲落枕涼板扉臨廣陌日聽馬蹄忙

二

入戶囂塵絕渾忘處市朝小畦蔬菜甲活水養魚苗
啜茗輕風至移床細雨飄暫開蔣詡徑砌草自蕭蕭

三

最愛清宵立微涼度小屏虛簷垂暗網短袂坐流螢

霧捲銀河白燈燃太乙青輕雷時一過指點見疎星

觀獵

小隊城南獵輕裝響角弓黃鵬盤落日金勒動秋風
霜拂平蕪淺沙寒狡兔空擊鮮張廣幕笑試寶刀雄

西山道中

始識西山路前驅入翠微水村依石轉沙鳥避人飛
木落交寒籟川晴罨夕暉萋萋原上草惆悵古今非

密雲督府署夙稱壯麗先少保曾建節于此余

奉使過之止存額垣敗壁而已徘徊四顧不

禁泫然因賦三律以志感愴

先人開府地今日我重來事業留殘碣樓臺付劫灰

松埋石洞老雪積野禽哀賜履羣公重猶傳濟世才

二

幕府餘荆棘低回獨黯然連營屯勁旅百戰控雄邊
歲月苔痕蝕風霾虎窟穿白頭諸父老指畫說當年

三

左輔金湯壯巋然故址存風烟臨碣石鳥雀靜轅門
吹角邊城肅鳴珂將相尊百年思祖德瞻顧媿曾孫

驛亭對月

朝雪初晴後虛庭月色饒客懷無盡夜人語可憐宵
暮角沉孤戍悽風斷麗譙驛燈寒自對把酒漏迢迢

山雪曉行

環縣羣山霽皚皚雪滿巒虎踪留數里鳥逕動千盤
古渡臨層壑危橋帶急湍不須嗟蜀道始識路途難

二

孤城驅小隊出郭映晨曦雲氣山初曉烟光店早炊
霜林收籟寂雪騎度冰遲何處關愁思蕭蕭塞草衰

七夕

天上雙星合人間欲白頭疎燈砧杵夕涼雨鳳城秋
露氣遲清宴蓮香澹御溝長河望不極鄉思一登樓

新葺齋成

小室延朝霽悠然地有餘開簾宜醉月燒燭好攤書
清福三冬足閒心萬事疎放衙危坐久不似市朝居

二

初放黃花日隨緣小築成當門除蔓草虛閣入秋聲
燕雀知相賀琴尊倍有情南山如可見採菊學淵明

曉行薊州道中

都城久不出今日到山樊溪漲春田雨沙融野水痕
曉烟寒戀寺綠樹遠藏村前路輕陰結蒼茫是薊門

入山

策杖向朝曦藤蘿手自捫懸猿升木杪怪石倚雲根
落日川原黑歸途雨氣昏三峰縹緲出羣岫列兒孫

二

林麓手廻合岩巖近石門前驅迷谷口回首失山村
碧澗蛟龍鬪青天虎豹蹲崩崖橫夕照歷歷塞垣存

雨中出馬蘭關

昔日屯兵處蒼蒼疊亂山
平蕪春牧馬細雨曉臨關
燧火荒墩廢邊防老卒閒
百年餘戰骨埋向野雲間
黃花山遇雨電

天削芙蓉出參差歷亂青河山
開王氣雷雨聚羣靈
潭黑魚龍泣沙昏雁鷺冥
孤村聊駐馬燈火暗漁汀

三河縣

萑爾三河縣何堪傍
帝京丁稀愁役重里瘠視官
輕白日收村市黃蒿閉古城
五陵人已沒芳草爲誰

生

贈程箕山年兄之河南任

良朋持節去爲我畫滄洲
裘帶羊開府丹青顧虎頭
離亭春柳暗落日大河流
嵩少風雲色多君攬轡遊
新築堂成

築室成虛敞陰陰暑氣消
曉風晴灌竹細雨晚移蕉
散帙忘機事偷閒玩市朝
雖非蔣詡徑二仲可頻招

二

關地植欄藥喧豕入戶空座懸
高士榻窻納故人風

月映虛簷白香生小樹紅草堂眠乍穩雅尚有盧鴻
秋日遣興

書屋延新爽遙山積翠深雲流秋徑濕蕉覆午窓陰
風雨還家夢波濤倦客心夜涼驚太早蟋蟀入床吟

二

盡日虛堂坐閒如處士家拋書聞落葉把燭照簷花
露重螢光細風高雁陣斜栖栖何所事吾意在桑麻

贈錢長孺司理之貴池任

司理官元貴今看玉樹枝百城尊漢法三尺答明時

東海寃能白南山判不移九華峰秀絕飛蓋每遲遲

二

子才如竹箭佐郡復江東遺笏承先世傳經有父風
行裝隨獨鶴水驛逐秋鴻到日觀刑措須教案牘空

中秋前二日夜坐與三叔父對酌

御袂暮寒生秋齋過雨清未圓明月夜漸老故園情
露氣兼花氣風聲亂竹聲南飛見烏鵲把酒欲沾纓

中秋夜集

待月頻移席茅堂倚樹開忽看清影上如覩故人來

秋露生衣袂銀河落酒杯夜闌聞玉笛停酌幾徘徊
秋夜偶興

皎皎竹埤月閒吟步綺疏掩扉三徑菊樂志一床書
客思鳴蟬外秋聲落水餘星辰如可摘蕭颯草堂虛
送何誕登司李瓊州

萬里匡山送子行張燈樽酒憶平生十年交誼同蘭
臭此夜悲歌變羽聲嶺嶠瘴烟連海氣枕椰暑雨滯
江程明朝匹馬春風遠撥罷琵琶淚滿纓

送寶臣舅氏之任臨洮衛

寒風獵獵木綿裘燕領書生賦遠遊岐路一尊河朔
淚夕陽萬里隴雲愁函關夜雪鳴鷄度洮水春冰繞
塞流惜別酒杯須更進男兒壯事在吳鉤

壽顧考功母孺人

槐庭風靜綠陰重賢母吳門號女宗繞砌芝蘭勤畫
荻中宵絡緯伴鳴蛩朱顏數見蓬萊淺紫液新浮琥
珀濃先世辟疆佳勝在板輿花下日從容

壽嚴黃門母孺人

星明寶婺越江湄花發高堂介壽時脫珥成家心獨

苦挑燈課績鬢如絲
孫枝戲舞朱樓暮
山色晴薰白晝遲
莫悵倚門違彩服
天邊鳴鳳有佳兒

送王晉劉學憲之河南

儒臣珥筆舊談經
憲節新持出漢廷
當代狂瀾廻砥柱
中原多士見儀型
圖書秘府充行橐
河嶽雄蟠聚地靈
坐擁臯比官自貴
烏衣年少是文星

送李繼俊令寧海

市駿曾空冀北羣
分符遠傍越江濱
天台霞氣連鳧影
仙令琴聲入島雲
軍鼓頻驚滄海戍
戈船新練水

犀軍書生莫畏多
烽火年少看君早
策勲

過金魚池訪友人不遇

市南平沼水浪浪
蘭若人稀白晝長
魚藻風翻菱葉靜
轆轤聲過菜花香
偶從戶外書凡鳥
何處壚頭貫鷓鴣
悵望郊壇雲影暮
蕭然返照下橫塘

寶臣舅氏自臨洮寓書却寄

執手曾吟出塞篇
書來隴右倍悽然
倚門親在當垂暮
投筆官貧似罄懸
漸老朱顏孤戍外
遙將錦字去鴻邊
渭陽此日多愁思
秦樹依依悵晚烟

送人出守越中

江東領郡佩銅符賢守今稱漢大夫行麓自携循吏
傳樞曹頻按職方畝島民賣劍鯨波偃水國褰帷海
日孤莫道書生無壯事單車看爾靖南隅

二

多君投分古人中數載爲郎宦橐空如水盟心清自
許凌雲奏賦調誰同推篷秋雨停孤棹挂席江風伴
去鴻五馬喜當山海郡行春幸不廢詩筒

檀雲遇雪

曉望南山攬翠裘朔風飛雪滿檀州春迴黍谷寒吹
律笛落梅花暮倚樓發粟淮陽慙汲黯立功薊北憶
田疇帝城縹緲紅雲近咫尺偏生塞上愁

薊城感懷

孤城落木晝茫茫碣石遙連海氣黃殘照晚明燕嶠
雪亂山寒擁薊門霜天清亭障銷烽火日暮谿田避
虎狼自古阡危邊郡地百年征戰事遼陽

觀素練泉

虛敞城隅好亭子小池拖練水泠泠波光遙接雲俱

白嵐氣晴薰草自青樓閣飛烟涵夕照蛟龍蟠窟護
山靈風塵瀕洞茲遊少步屨清流倦眼醒

二

濯纓數欲俯滄浪泉石蕭然此一方檻外雲容迷古
堞橋邊岫影下寒塘冰壺日映遊魚樂水榭風微野
菽香聞說中丞能好客小舟泛月憶飛觴

蘆溝道中

芳原小隊擁鳴珂村巷疎烟帶淺莎廝養臂鷹廻遠
岸王孫挾彈度渾河皇州縹緲春雲合沙磧逶迤落

照多駐馬西山青可挹迷津莫問悵如何

送張晦先遭繼母夫人喪還里前按粵曾撫巨

寇

七尺身留萬死餘麻衣又見返荒廬威行海國消鯨
浪孝感慈闈躍鯉魚送客兩行燕市淚歸裝數卷嶺
南書篝燈猶憶論文夜君去誰能更起予

祝史太公見峯雙壽

甬東世德挹清醇處士風流白氎巾跼履曉觀滄海
日扶筇老傍鏡湖春庭中讓產荆花放廡下齊眉鶴

髮新有子鳳池頻染翰泥書五色到垂綸

送高淑觀年兄補龍南令

十年作令識君才又綰銅章贛水隈
野戍墟烟沉戰壘訟庭人吏雜
蒿萊山連五嶺啼猿急濤暗三江瘴
雨來荒徼無言風土異須令到日縣花開

秋夜餞晉公姊丈之桂林卽席聯句

飛觴送客漏沉沉一曲驪歌別思深
露下綺筵秋漸老香生桂樹月初臨
篝燈燕市聯床話捧檄蒼梧萬里心
百粵山川元秀絕褰帷君莫廢清吟

送顧蓓來考功假旋吳門

潞河清曉放蘭舟賜沐恩承晝錦遊
數卷圖書歸吏部片帆風雨載高秋
客心芳草城邊路宦况浮雲江上樓
人物九流須水鏡辟疆勝地莫遲留

壽季因是先生

早揮兩袖自徜徉老駐朱顏集舞裳
秉鑒猶傳山吏部持籌今重地官郎
烟雲供養長康筆泉石經綸李相莊
海上花開春日暖紅潮滾滾影扶桑

壽姚父庵年伯

孝友堂中樂事稠
婆娑宣髮晚夷猶
菊松自喜同元亮
鄉里爭傳似太丘
令子聲名青瑣闥
老人杖履白蘋洲
雪溪雨後穠花發
永日酡顏狎海鷗

寄祝王硯存年兄

獻賦當年憶壯圖
投簪未老傍江湖
躬耕十畝秋雲擁
跼踖履三山海月孤
誓墓有懷同逸少
責忠無愧著潛夫
知君代受青箱學
階下聯翩繞鳳雛

送王燕友假歸合肥

圖書携去一舟輕
把酒燕山送子情
共羨李膺同畫

舫誰如張翰遂
尊羹片帆秋雨菰
蒲色兩岸江風蘆
荻聲七載宦成今
衣錦淮南猿鶴遲
歸旌與宋直方
饒型萬同

舟

二

振衣休沐問滄洲
潞水湯湯遶驛樓
漁浦晴開菡萏香
暮楓村香發稻花
秋酒人燕市增離
索詩友江程足唱
酬行矣鋒車宜早
駕朝簪海岸莫輕
投

送金又鑣年兄之汝南太守任

五馬乘秋太守行
舊遊共識使君清
鳴琴陝洛棠陰

滿斷獄中原貫索明曉出名花開幾縣春來甘雨散
孤城汝南自昔多循吏特賜油車重漢京

送徐玄文考功還武林

刻燭論文意氣真君家元是石麒麟苦吟直欲追風
雅純孝曾聞動鬼神八月帆檣天上客六橋烟雨鏡
中人山居著作千秋事莫逐輕肥傍市塵

二

冰壺玉尺映高秋吏部清通爾獨優載酒每邀燕市
月囊書忽上武林舟滿山紅葉迎歸棹千頃寒潮打

郡樓別後常懸孺子榻詩筒好爲寄江郵

秋懷

中年節序倍關情最怪秋蟲藉草鳴賣穀野農憂急
稅裹糧甲士怨長征青門瓜圃行吟路紅女隣墻搗
練聲可惜流光彈指換空教署尾絆虛名

二

朝來拄笏掩雙扉香草堂前望翠微雨足新田秔稻
熟蘆深秋水蟹螯肥辭巢社燕渾如客避地邊鴻尚
未歸好趁體強黃犢健城西載酒典朝衣

送孫忤庭黃門假歸歷下
拜疏黃門返舊廬一時鳴鳳更誰如尚方獨請朱雲
劍痛哭曾陳賈誼書秋老溪山供伏枕花明湖墅屢
中車便宜佇待還朝奏院滿梧陰未合虛

壽大叔父

時予告里居

槐館開尊綠影稠初看勇退臥滄洲山中服食陶弘
景架上圖書李鄴侯華月晴臨絃管夜池花香澹芰
荷秋高堂日奉西王母不假瑤京十二樓

送葉眉初年兄登第歸崑山

紫髯吳客度翩翩何減機雲入洛年都下舊傳梁苑
賦宮中新奏子虛篇鶯啼禁柳春遊騎人返澄江夜
泊船相望彈冠多夙好漫從南國滯風烟

寄懷錢仲芳年兄并謝寄詩

孤吟抱膝臥江濱旗鼓中原自屬君高蹈幼安傳皂
帽低頭楊子著玄文開軒香滿檐前桂曳杖紅看海
上雲當日鷄壇人幾在西風那不念離羣

二

開函遠道誦新詩紈扇清風絕妙詞愧我未嫻司馬

法惜君猶在臥龍時三年書札淹懷袖萬里停雲對
酒卮且喜鳳毛初捧檄亭亭玉樹是佳兒

三

魏塘風雨閉雙扉倦罷公車戀蕨薇楚服裁成吾道
貴陽春唱出和人稀帳中應自矜鴻寶海畔于今有
布衣他日相思烟水曲蒼茫何處問漁磯

戊戌除夕

一夕春風滿漢京濁醪緩酌伴燈檠不才濫接夔龍
武久客頻虛鷗鷺盟書債索來終歲有世緣閱盡百

憂輕相看頓訝非年少白髮明朝又幾莖

巳亥元日

燈火闌衢自掩扉吾生四十歎全非年增甘讓屠蘇
酒兒大能披萊子衣幸有一編消白晝難將寸草報
春暉勞勞門外多車馬暫息茅堂興莫違

元夕

烟飛宮蠟雪初晴青玉光懸戶戶明遶路香塵角觝
戲傍人華月踏歌聲車書萬國春無恙鎖鑰千門夜
不驚最怪五陵諸俠少錦鞵細馬徹宵行

吳甥至自里門

小堂曉起噪簷禽忽覩陽元喜不禁每怪儀形真似
舅况當春夜果如金里門燈火從容話客子京華去
住心夢到家山渾欲舞汝來愈我病侵尋

元夜齋中獨坐

六街遊騎擁刻燭獨高吟清吹來天上輕烟出禁林
歲華三徑草宦海十年心漫奏陽春曲從誰覓和音
十六夜集家光祿堂中

高館張燈夕京華又一春乾坤同節序兄弟并風塵
華燭將闌夜清輝似戀人門前塵不斷洗盞莫逡巡
送史煥章黃門給假歸鄱陽

垂橐黃門冷言歸亦洒然離樽燕嶠月春水豫章船
抗疏焚囊草躬耕傍墓田無臺堪避債莫辦買山錢
二

進賢不受賞鼓枻返江湄郭璞書堪讀休文帶屢移
柳垂春岸濶帆落夕陽遲家傍仙人宅丹砂自可期

黃門將歸卜兆
兼善病故云

送李五鹿司農歸山右

司農清比潞河流揮袖春風識倦遊漕輓早登天府
粒漢家初拜富民侯上書玄髮輕朱紱跼履青山有
敝裘國計于今須石畫可能烟月自夷猶

送嚴灝亭給假還武林

冰泮河橋解纜初暫投簪紱問樵漁人倫東國馳清
譽直筆中朝頌諫書水驛雁來春雪後江城笛弄晚
潮餘治安籌策須公等莫遣湖邊歲月虛

壽施尚白學憲

旗鼓中原早擅名臯比日進魯諸生帷開絲竹春風
細閣擁圖書夜雨清伏枕三山來曲檻高吟五字抵
長城多君語帶烟霞氣矯首扶桑島嶼明

寄強九行年兄時遊真定

孤舟落拓傍江湖憔悴行吟楚大夫誰更綈袍憐故
舊翻令席帽擁泥途典裘幾醉中山酒垂橐猶携五
嶽圖河朔少年能結客悲歌曾識慶卿無

春日家園樂

雪消大陸古堤平綠滿東園水拍城出谷雛鶯晴坐
樹鈞簾少婦午調笙碧陰遊冶金丸小細馬春衣白

怡輕戶戶巾車烟雨後杏花零落近清明

春日帝京樂

綠烟如織午風和輦路珊珊響玉珂花市青帘燕谷
暖金盤麗日漢宮多梯航闕下新王會歌舞侯門
舊綺羅三徑自生春草細從容退食盼庭柯

聞王師入滇

公孫據蜀欲何如萬里新傳露布書橫海將軍兵不
戰垂衣天子筭無虛夜郎蕞爾投戈日父老歡然
放馬餘初服蠻方勤廟畧三章漢法古來踈

贈益都孫公子

翩翩公子善稱詩喜讀奚囊絕妙詞授簡初看成賦
後問年正及棄繻時人傳謝氏池塘句我畏孫郎帳
下兒壇坵濟南今有屬通家相見恨交遲

春日雨中傳掌雷司農招飲城南賞花

荇葉田田燕子斜結茅臨水似山家避喧林外停飛
蓋選勝城隅坐落霞三徑香生榆莢雨一樽人醉杜
陵花短籬春鳥如相和漫對東風負歲華

清明前一日遊高廟

步屨臨蘭若高臺佛日圓鳳城飛野馬羊角上風鳶
春院鞦韆索人家楊柳天探幽酬節序未敢慕逃禪
寒食劉淇瞻少司馬招遊憫忠寺萬壽宮

寂歷城南陌停車野色新白雲塵外寺紅袖水邊人
載酒聽鶯舌行歌藉草茵不緣山簡召誰識可憐春

二

禁火芳原曉青鞵混酒徒朝回當小隱市遠卽清都
宮秘仙人籙花開杜曲圖行春聯寶騎處處有提壺

送吳晉公姊丈之隴西任

携家從桂嶺佐郡復雄邊閣閉秦川雨帷開太白天
春防嚴斥堠乳酪上炊烟最愛涼州曲須君驛使傳

二

把酒燕山別茲行亦壯哉邊聲隴水咽樹色塞雲開
苜蓿春調馬葡萄夜覆杯羗兒歌舞處應識使君來

送百翁叔岳之石埭任

名儒初作吏道久重河汾春雨隨征旆離觴對暮雲
江聲千里合山色九華分先世王喬鶴翩翩自不羣

二

行路難如此蹉跎拜一官莫言鳧鳥貴仍作布衣看
循陌催耕稼當階養蕙蘭東南民力盡問俗念凋殘

三

分符山水縣芳草度輕車舊放劉蕢策新栽晉令花
訟庭希案牘人吏帶烟霞行見絃歌滿鳥啼晝不譁
送李蘅若年兄之嶺右

五嶺天垂盡曾經馬伏波氣蒸飛鳥避木合夜猿多
猺洞堪傳檄樓船尚枕戈漢家銅柱在事業莫蹉跎

二

分藩百粵重使者入炎方不畏貪泉酌何辭鳥路長
潯江衝瘴癘蠻雨暗枕榔萬里單車去還期數舉觴

送王襄璞方伯還閩中

燕山雨雪喜逢君方岳誰過閩海勳蓮幕日招珠履
客金錢歲給水犀軍歸途詩卷盈孤舫拜闕衣冠
傍五雲騎竹蠻兒遲使節徵書早晚下江濱

聞張晦先自越中携書歸走筆寄訊

聞君吳越買舟還遊歷西湖第幾灣曾否秘編傳海
上有無金簡出人間晴窓散帙牙籤細春晝焚香茗

竈閒我亦蓄書支俸盡竒文可許共開顏

送李文孫少叅之河北任

分藩飛蓋傍春鴻千騎諸侯賜履同開府中原新使
節詞臣楚國舊雄風山家雨色天壇樹驛路河流瓠
子宮上黨地連煩鎖鑰看君儒服奏竒功

二

驪駒何事度津亭藜火曾燃乙夜青自昔周南留太
史于今河北借文星春風按部花盈縣晴日褰帷綠
浦汀珥筆卽當還紫禁韋賢家世本傳經

華亭王封君胡孺人雙壽詩

九峯霞氣聚真人海畔雙星介壽辰令子陳情深愛
日高風偕隱遠飛塵笙調緱氏山中鶴脯擘方平座
上麟鳩杖板輿春未艾清時歲月老閒身

送王伊人侍養歸雲間

青門風雨羨鴻飛返哺慈烏願不違九折早廻王子
馭孤帆今見季鷹歸携來帝里新詩卷舞傍高堂舊
繡衣垂白兩親猶健飯持竿三泖鱸鱸肥

送楊子玄宗伯侍太夫人還河內

陳情宗伯世誰如漠漠飛塵御板輿躡屐晴遊王屋
洞奉親獨釣孟諸魚三公愛日輕華袂五月乘風問
舊廬見說容臺興禮樂寧能高臥草玄居

送萬年兄之任太原

暑雨燕山送玉珂十年嶺海老干戈分藩人似羊開
府歸漢名同馬伏波畫戟曉臨汾水曲白雲秋傍太
行多晉陽自昔稱雄鎮保障功成更若何

壽郭石公母夫人

竹西歌吹綺筵清太守能成令母名長日辦香供繡

佛中宵絡緯伴孤檠樽開醞醲籬花發桂滿秋巖海
月明介壽喜當新捧檄庭前五馬自縱橫

送郭石公守順德

皂蓋翩翩擁去騶美人出牧古邢州持籌粉署推民
部騎竹兒童迓細侯禾黍風高川麓曉濁漳雨落石
門秋太行山色元如畫潑墨看君作臥遊

送劉憲評中丞撫寧夏

賀蘭天外自嶙峋地控靈州虎豹屯栢府少年新授
鉞都亭當日舊埋輪千山野燒風沙急列障秋防鼓

角振知爾聞鷄如越石吹笳行靜玉關塵

送趙一鶴令趙城

秋風汾上莽蕭蕭再綰銅章強折腰勞吏十年催鬢
髮孤城百里困征徭遺民不改陶唐俗國士猶傳豫
讓橋計日政成看奏最郎星咫尺近雲霄

王太君壽詩

烏衣氏族美蟬聯江左羣推太母賢絃管清宜秋月
下舞裳暖傍早梅前宵看絡緯依燈火座有仙人問
海田相國兩家傳舊德懸知咏雪載新篇

寄祝家兵憲叔父

溪山伏枕夢于于介壽堂前列鳳雛香暖檀槽頻顧
曲風迴銀燭笑呼盧徑開自有陶潛菊身退新成范
蠡圖月滿樓臺秋似水清宵絃管在蓬壺

秋日送婁鶴笙進士歸里

少年早看上林花歸去鷄窓擁五車玩世清狂嵇叔
夜輕財任俠魯朱家燕山邀月芳樽滿易水衝風席
帽斜後進里中誰得似攤書莫漫負韶華

送吳玉隨編修予告還全椒

君家伯仲等璠璣何事投簪下玉除宦橐一錢留杜
甫茂陵四壁病相如風驅羸馬津亭暗霜落江天木
葉疎忽憶元方龍臥久栖栖每愧寄雙魚

二

薊門飛雪問王程襍被蕭然去住輕每羨堂中推孝
友遂令海內重科名風塵拂袖維摩恙鄉國驚心下
瀨兵太史周南無久滯山居早晚著書成

送姜漚思侍御出赴南昌叅藩

歲暮冰霜滿驛樓美人惆悵去南州殿廷猶自推遺

直鎖鑰居然擁上游豐獄夜間牛斗氣滕王閣外大
江流千年孺子清風在高士須君下榻留

退谷歌

昌黎昔日稱盤谷泉甘土肥繁草木高風千載如見
之紛紛塵世誰相逐于今再覩北海翁巖栖獨躡西
山麓西山雲氣何冥濛陰陰竹樹幽人宮飛瀑潺湲
懸素練老松夭矯蟠虬龍碧苔黃葉林中寺白鳥青
蘋水面風一自上書辭鳳闕入山長揖烟霞窟藏書
萬卷映晴窓濁酒一樽弄華月圖書何讓米家船周

鼎商彝不記年手斲黃精煮泉水籠開野鶴凌青天
逃虛自禮維摩室閉門愛草楊子玄荒臺蠹蠹平如
掌攬衣長嘯羣山響古庵開遍櫻桃花曳杖春風聊
獨賞人事有代謝山林關廢興柳州住愚溪百世傳
其名老翁居此殊有情窅然退谷疇能爭噫嘻北海
翁嶽嶽世無偶歸來閒却經綸手高臥不救蒼生哭
採芝去覓商山叟前年示我退谷篇千峯萬峯落几
前人生苦被塵纒縛願從老翁翔寥廓君不見長安
漠漠風沙昏顛倒世事安可論谷中歲月似太古何

處更有桃源村

蕉林書屋歌

主人疎放麋鹿性小築茅茨愛幽靚地偏偶結陶潛
廬客至暫開蔣詡徑種蕉陰陰如綠天北窓長日疑
小年攢莖抽葉布清影赤日障蔽空堂寒倚檻數竿
竹髣髴瀟湘浦秋晚畦流漠漠雲夜涼簾捲聲聲雨
主人樂此長閉關簷花如綺圖書閒當門不種鈎衣
草入室頻移幽谷蘭車馬九衢任雜遝坐擁萬卷心
悠然焚香偃仰復何事蕭颯志在滄洲間塵壒紛紛

安所極獨上元龍樓百尺自笑平生與世違且對蕉
林共晨夕出門波濤袞袞來仰視浮雲興太息

潭園歌

鎮陽昔稱成德軍裹瘡百戰恒紛紛我聞潭園自五
代池館壯麗連青雲數百年來閱今古江河袞袞揚
塵土當日王鎔貴盛時曲沼帷房貯歌舞赫然名城
冠四方河朔雄踞疇能當年少擁旄歷數世茲園爲
樂春宵長匡威旣滅趙王死年年花落空潭裏賦詩
再見歐陽公可惜風光同逝水我爲潭上人不覩潭

上花日暮悲風起城闕喧啼鴉繁華銷歇霸圖盡亭
臺何處徒咨嗟徒咨嗟行且歌古來富貴幾人在朱
樓金屋餘青莎人世百年苦易盡蜂屯蟻鬪何其多
登高望故墟雪涕一回首荒塚自纍纍頗牧今奚有
平原客散邯鄲空王父宮中麋鹿走吁嗟北潭昔爲
龍鼉窟今已沒蓬蒿滹沱白浪楚天高南眺忽失趙
州橋賣漿博徒真吾友欲往尋之阻洪濤君不見信
陵救趙日獨從毛薛游片言解紛掉臂去談笑座中
無王侯

挽船曲

寧爲官道塵勿爲官道人塵土踐踏有時歇人民力
盡還戕身長安昨日兵符下舳艫千里如雲屯官司
催夫牽纜去扶老携兒啼滿路村村逃避鷄犬空長
河日黑濤聲怒絳夫追捉動數千行旅裹足無人烟
窮搜急比勢如火那知人夫不用用金錢健兒露刃
過虓虎鞭箠叱咤驚風雨得錢放去復重催縣官金
盡誰爲主窮民袒臂身無糧挽船數日猶空腸霜飈
烈日任吹炙皮穿骨折委道傍前船夫多死後船夫

又續眼見骨肉離安能辭楚毒呼天不敢祈生還但
願將身葬魚腹可憐河畔風淒淒中夜燐飛新鬼哭

春風亭歌

弔滋溪先生也

東垣城北春風亭別墅創自滋溪公蘇公風流擅當
代名與恒岳爭穹窿我聞茲亭結構始闢園植木安
豐里桃杏千株樹樹花翼然亭立臨滋水春風澹蕩
滋水流花開花落聞鳴鳩歲久積土高成丘先生旣
去亭空留舊有讀書堂復築舒嘯臺于今廢址生蒿
萊堂中圖史安在哉憑高四望徒徘徊爲問安豐人

不識舊亭處臺榭已茫茫春風自如故荒原寂寞迷
烟霧行人祇見安豐樹先生本是濟世人先憂後樂
擬退身黃農虞夏在懷抱有志未竟何艱辛嗚呼人
壽幾何今時難再得滋溪終古流不息日落風吹大
陸塵先生不見淚沾臆

百鹿歌壽袁封公

嵯峩青壁雲霞紫晴開島嶼中天起百鹿馴擾鳴啣
啣芝英五色紛如綺丹青妙筆疑有神蓬萊移入空
堂裏堂中主人宣髮翁方瞳炯炯顏常紅談經不讓

玄成學孝謹猶傳萬石風令子登朝流世澤燕山竇
氏將無同絲綸捧來霄漢上鳩杖賜出明光宮君家
兄弟誰能匹梧省栢台聲奕奕介壽嘉平繪此圖烟
雲冉冉生几席鶩溪十丈光色坐解衣盤礴觀者驚
白鹿古來號仁獸徘徊顧侶如有情巖岫窈深林木
靜幽人住此能長生我翁聞道神冲漠大年不假千
金藥開筵自致綏山桃張燈笑引金鑿落遠害心同
麋鹿遊咫尺彷彿崑崙丘倚風長嘯海天碧花前歲
歲調箜篌碣石滄溟在眼底何須控鶴緱山頭

題王筠侶畫

王生好畫風骨奇青蚓崔子爲之師解衣盤礴掃毫
素經營直與古人期壚頭白眼傾百斗畫出重比雙
瓊玖寫生淋漓妙入神濡筆化工常在手此幅精良
極苦心不讓徐熙與王友落落古木棲佳禽槐堂彷彿
聞清音宗伯築室花木深退朝茂對同幽林晴窓
開帙氣蕭瑟何如置身秋山岑

南苑閱武應制

御苑奮龍驤鳴鏡擁貝裝禮成仙仗肅 天子自垂

裳

村夜

嶺雲沉浦月山店聽鶉鷓何事鄰春急村燈對雨孤

山村

覆茅爲屋亂雲鋪雷雨前山似可呼千載薊門形勝
地寒烟極望已模糊

盤山訪李光泗年兄不遇

憶昔看花傍帝畿十年避弋羨鴻飛登山欲問桐江
叟風雨冥冥冷釣磯

過香花菴

松門深閉送年華
漠漠孤雲伴落霞
春色滿園長不掃
東風閑殺碧桃花

秋夜小集聽彈箏限箏字

花發秋堂夜氣清
喜同良友話平生
百年幾醉燕山酒
此夕初聞秦女箏

二

迢迢河漢澹秋城
香滿疎簾酒滿罍
一曲涼州華月下
笑看銀甲坐鳴箏

二月雪

長天雲暗雪皚皚
二月河水尚未開
曉起推窓寒切骨
茆齋昨夜凍春梅

壽鄒翁

袁馬光華動帝鄉
清風高宴鬱金堂
論交慷慨如朱穆
置驛風流過鄭莊
闌卉晴薰花氣暖
檀槽醉擁漏聲長
翩翩令子王門客
醴酒頒來午夜香

壽祝司農

老成謝政遠風塵
開國名尊第一人
貢賦九州歸地

部貂蟬七葉表勲臣擁書雪照軒窓曉種樹晴薰藥
圃春黃髮番番鶴骨健儀形久已畫麒麟

贈菊潭翁家世爲將

曾經披甲戰場深白髮歸來種杏林藥售市中無二
價方從海上授千金還丹吐納真人訣撫劍悲歌烈
士心當日東陵瓜圃在高風今古未銷沉

送婁鶴笙令涇縣

少年奏對識終軍涇水鳴琴早策勲濁酒袂分燕市
月秋風帆落敬亭雲轉輪閭左憂繁賦組練江干急

寇氛到日須教花滿縣翩翩仙令久空羣

清明

綺陌寒初斂新烟細細生鶯花縈曉騎風雨散春城
久宦功名損中年寵辱輕昔賢良有託珍重是清明
上巳

兀坐春無賴逢時倍惘然賣花三月雨挾彈五陵天
修禊懷鄉國風塵失歲年勞勞緣底事虛負杖頭錢
花朝飲半齋

接宇忘賓主床前拜老龐妻孥呼作黍烟月迥臨窓

客醉添銀燭花飛撲玉釭一官頭漸白攬袂壯心降
花下小飲

閒院春如許誰憐小樹紅偶從花底醉喜與故人同
蛺蝶翻晴晝蛛絲散午風破愁真欲舞影亂夕陽中

訪李二公宗伯賦贈

春明門內卽村居薜荔蕭然十畝餘市遠鄰家頻過
酒地偏花外偶停車一樽醉擁平泉石萬卷晴攤李
謚書解組喜承新寵渥鑑湖爲樂更何如

送劉瀛洲大司空致政歸蘇門

尚書擁傳綠楊天共美承恩少傳賢種德久平東海
獄鳩工不費水衡錢老臣心事懸雙闕野服山蹊弄
百泉身退名完誰得似履聲常在五雲邊

初夏齋中

輕陰細雨響庭柯開徑唯應二仲過蕉影上窻新筍
直蛛絲垂戶落花多焚香自信無機事退食寧能廢
嘯歌門外儘教塵十丈坐銷白日似山阿

送王弁伊學博

雙鬢儒官老頻來坐夕曛談天空稷下知古問高君

暫醉中山酒還看嵩少雲
薊門秋可戀遲爾細論文
午日王襄璞方伯召飲金魚池次王敬哉大宗

伯韻

午日烟波動夕陽采菱風起鬱金堂
平沙碧草晴調騎隔樹朱樓巧炙簧
百道泉流歌館外五陵客醉酒
鑪傍留髡永晝堪忘暑寂歷漁燈下柳塘

送袁九敘司馬填撫雲南

建節乘風萬里行殊方鎖鑰仗儒生
富民自屬司農任柔遠應知
聖主情北極常星臨楚甸南天秋色

落昆明輕裘共識羊開府六詔烽烟指顧平

二

青門祖帳草萋萋吹角樓船組練齊
天外版圖滇水盡蠻中鳥道瘴烟低
行看馬援標銅柱無事王褒祀
碧鷄父老感恩歸漢法西南歌舞徧雕題

三

良朋悵別欲沾襟風雨燕臺白晝陰
募士自將三輔騎椎牛特予尚方金
黃雲飛輓安邊策明月江帆報
主心回首帝城家萬里莫教天北雁書沉

壽張螺浮給諫母顧太孺人

帝城絲竹擁潘輿鶴髮皤然麗日舒慈母早勤忠孝
訓佳兒數奏治安書盈尊蒲酒邀明月過雨盆榴照
彩裾婺女星高東海上蓬萊深淺近何如

送張晦先僉憲之松龍

圖書數卷去邊州萬里蠶叢亦壯遊隴樹影迷雲棧
曉夜猿聲斷錦江秋羗人歌舞思廉吏荒塞烽烟借
勝籌惆悵一樽燕嶠暮送君風雨罷登樓

二

郎署十年領外臺清風共識使君來南巡炎海鯨波
偃西望青天鳥道開緩帶不妨耽嘯咏枕戈親爲闢
蒿萊遐方莫嘆功名薄節鉞須煩管樂才

送張伯珩司馬開府關中

鳴笳開府帝王州百二河山借壯猷車上范滂獨攬
轡軍中羊祜但輕裘露盤秋洗邊烽靜渭水晴翻漢
月流形勝三秦節鉞重看君年少取通侯

送王仲昭內弟令宣化

王子髯如戟分符及少年孝純由至性清白自家傳

問俗干戈日栽花瘴癘天
獠人皆赤子雨露莫教偏
二

嶺右天垂盡邕州初服時
苦兵官稅薄作令此方宜
鳥道輕裝便鄉心匹馬遲
南天稀雁羽錦字莫差移
三

萬里茲行始銷魂是別筵
呂虔刀可贈馬援柱猶傳
古樹啼哀狄炎風墮跼鳶
君家雙鳥在好傍五雲邊

祝馮太公雙壽

德門累葉挹清風江左誰
過大小馮漢代衣冠尊萬

石山居夫婦比龐公書傳
北固徵君鶴人避西臺御
史驄孝子娛親憑翰墨新
聲譜入管絃中

壽河內范太公

太行盤鬱見期頤謝氏庭
生玉樹枝祝噎正當扶杖
歲稱觴喜及放梅時地官
祿養恩波重野老逍遙化
日遲繞膝壘篋應并奏花
間響徹碧參差

高似斗司寇饋舊瓷椀王
襄璞方伯致朱魚數
頭畜之几案燦然可觀炎
熇頓清喜而有作

錦鱗吹浪弄湖光誰使移
來几席旁遂覺波濤生海

氣俄驚風雨到茆堂
冰壺皎映花瓷薄
菱葉斜牽翠荇長
咫尺清寒消暑暘
漫將此樂問濠梁

夏夜集襄璞方伯金魚池寓舍同石生總憲淇
瞻司馬似斗司寇

晚涼池上好蕭颯似漁村
燈火明林屋星河落酒樽
放歌吾輩在擊筑幾人存
欲問乘槎客蒼茫水氣昏

二

落日共披襟關關聽水禽
醉鄉司馬態薄俗故交心
波定天光見臺高暑氣沉
悄然羣動寂風雨有龍吟

三

何方堪避暑此地絕風塵
夜靜魚吹籟池清月趁人
豪同袁紹飲座是孔融
賓不淺滄洲典吾將理釣緡
雨後坐齋中

雨過清風至開襟得好朋
花迷穿樹蝶簾隔聚羶蠅
屏慮成愚谷焚香比定僧
悠然無剝啄戶外正飛矰
初冬送少宰大兄予告歸里

拂袖燕關曉冥鴻息羽翰
維摩初示疾疏傳蚤辭官
北闕絲綸渥東郊竹樹寒
太行從面起捲幔雪中看

二

八座歸田早爭看去國榮登車知病減解組覺身輕
松菊柴桑業尊鱸張翰情人生鄉土樂到日自清平

三

兩年書再上今喜逐烟霞共羨天官福仍同處士家
晴窓探藥裹春雨養穠花爲祝加餐飯無須勾漏砂

四

余懷同倦鳥惆悵送兄歸林壑無矰繳簪裾有是非
夕陽樽酒罷落葉驛亭稀不及南樓雁相呼結伴飛

春日送光祿兄侍養歸里

送兄曾未幾又見促歸裝錫類恩波重承歡歲月長
晨光開古驛柳色動春塘修竹吾廬近應先辦鶴糧

二

一堂榮五世綵袖傍花前明月吹笙夜春風載酒天
不貪朱紱貴獨補白華篇玄髮親猶健三公詎足賢

三

久有尋真約今乘薄板車世爭誇畫錦仙自好樓居
紫氣關中駕丹砂洞裏書黃精當手斲服食竟何如

四

巾車春雨後花發古雕丘
泛月宵乘舫看山曉上樓
驥辭駑馬迹雁足稻梁謀
無恙韓溪水相親有白鷗
壽寶坻劉太公

海上稱人瑞一經老獨傳
賓筵祝哽日古禮杖鄉年
秘就黃金藥閒吟秋水篇
乘驄看令子舞袖自天邊

輓外舅王太常公

太宰直聲垂宇宙陽元令
譽著當時中朝名義歸厨
顧盛世清流借羽儀三木
竟成北寺獄百年猶重黨

人碑重論往事堪揮涕鄙
上遺風未可追

二

平生逸氣自空羣垂老官
猶傍五雲三篋亡書能默
記累朝故事及親聞家風
黯淡青箱學筆陣縱橫白
練裙一代典型今已廢西
清寂莫悵斜曛

三

早年悟道學飛仙飽歷風
霜塞上天真訣每求滄玉
法丹砂自錄養生篇初周
甲子形先化七守庚申秘
莫傳他日歸來華表鶴人
民城郭一潸然

欲歌薤露不成聲累世朱陳憶夙盟舊德人多傷木
拱淺才余久愧冰清老臣生死恩同渥廉吏兒孫報
詎輕疇昔緒言猶在耳遙阡極目幾沾纓

庚子元夕石生總憲召飲出所藏法書名畫共

觀賦謝

九天絃管散清都良夜從君醉酒鑪映雪銀花飛玉
案當筵皎月上金鳧書傳曲水山陰序技擅藍田別
業圖相對明燈頭共白乾坤尚未解雕弧

聞家兄新愈寄詩志喜

數喜鄉書達開函慰我憂春來驅豎子病已遇神樓
白墮樽須滿黃金藥可謀初開蔣詡徑曾否過羊求

二

池上葉田田平橋雨後天遙知筇竹杖時破綠楊烟
岸鳥迴歌扇林花落釣船閒身良不易好爲惜流年
雨中晏坐

積陰炎熇散竟日雨冥冥小樹迎人綠遙山拄笏青
蘚階喧瓦雀竹圃立蜻蜓閉戶耽玄草誰過楊子亭

二
適意開三徑孤吟遣四愁藥欄疎雨過竹屋暗香流
蕉影侵書幌檐花落茗甌午餘閒步屨身世等虛舟
輓徐玄文吏部母夫人

井臼儒風薄支吾憶苦辛青燈獨紡夜白髮未亡人
二髮能留客三遷屢卜鄰成名有令子含笑九原身

二
彤管千秋事一門節孝俱天涯歸旅櫬掌上保明珠
義重孤飛燕恩深返哺鳥筑筑風木恨哀輓動西吳

新晴

書屋看新霽鳴蟬何處音短垣生返照小圃落繁陰
仲蔚蓬蒿掩東臯藥草深雨中移竹活蒼翠喜成林

虞臣家弟分闔台州

結髮行間學六韜仲華年少擁旌旄軍移瀚海蛟門
險弓掛秋山雁蕩高疊鼓莫教驚越女椎牛頻自散
錢刀水犀破賊鏡歌奏月下啣杯解戰袍

二

虎頭分闔事南征落日蕭蕭細柳營人號黃鬚能決

戰身騎白馬早知名投壺漢將軍中宴飛檄盧循海
上兵斗印通侯懸懋賞卽看萬弩射潮平

偶成

天高雲不斷隱几夢魂清世事漁樵貴人情鬼魅驚
虛窓聞鴈過絮語任虫鳴敢悔吾生拙閒階數落英

秋日遣興

入室凝塵滿居然陶令家郊原猶戰鬥朝議正紛拏
玩世滄波鳥無心遠岫霞夕陽人獨立呼僕灌秋花

高子奮水部往視蘆政

雙旌南逐鴈鴻天簪笏傳家有象賢八月寒濤浮畫
舫六朝烟樹動朱絃仙郎舊擅梅花詠使者秋行江
上田葭莢蕭蕭民力詘輕裝好計水衡錢

王蘭陔年兄分司武林

冬曹乘傳促行鑣吳會風烟散六橋估客秋停滄海
棹戍樓晚上浙江潮軍船戰罷花無恙官閣梅開典
倍饒十里湖山君作主含香仙吏自雲霄

喜雨

蘊隆愁見碧天高一夕銀河落怒濤郊樹乍看秋色

動桑林足慰 聖躬勞流民失路還鄉井枹鼓稀鳴
緩賊曹海內昇平關此日探丸草澤正如毛

寄鄒元獲文學

高士爭看風雨中長吟破壁不知貧獨留蛙部供清
吹肯爲猪肝累主人書帶自生巖畔草講堂共識座
中春一瓊十載傷遲暮誰向衡茅問隱淪

送王襄璞方伯補任山西

前任右藩

笳鼓西風出鳳樓大藩重領古并州初看薏苡消官
謗再憇甘棠識舊遊桐葉依然唐叔地汾陰無恙漢

時秋富民知爾多籌策行必有勲高自列侯

壽關年伯母

吳山真隱白雲封有母能賢號女宗早歲熊丸和柳
氏高堂鷄黍美茅容聯鑣射策科名貴化日承顏樂
事重遙計板輿湖上好駢羅絲竹綠醅濃

正月十六夜齋居

隱几空齋夢數驚蕭蕭夜柝起嚴城樽餘濁酒燈花
落門掩千家獨月明

短燭虛窓暗復明
隔牆夜語數殘更
西宮已罷雲和曲
忽聽誰家爆竹聲

署中偶作

孤枕百感生無眠
空仰屋披衣視繁星
栖鴉滿庭木

壽高侍御母夫人

女宗名德古人俱
早撫艱難六尺孤
麗日清和娛素髮
繡衣直節著青蒲
慈闈舊却魚梁鮓
庭樹新巢御史烏
孝子奉親同潁叔
君羹頒賜自天廚

壽閩中蕭太公

閩海清修歲月長
少微今喜近文昌
史遷雙屐窮關塞
思邈千金授秘方
栢府聲名獨角貴
槐庭絲管百花香
使君愛日頻衣綵
帝里春風夜未央

春日送子璧內弟歸里

寒食輕陰送客歸
張燈執手各依依
遙憐趙苑春將暮
一路楊花作雪飛

二

匹馬遲遲日又昏
月明人倦臥孤村
曉來酒醒頻東望
疎柳蒼烟是薊門

春郊卽事

郭外風烟斷客覓金鞭玉勒走王孫
田家楊柳垂垂綠芳草斜陽晝閉門

二

珠宮紺殿倚寒空向日山桃寂寞紅
齋罷老僧初禮懺磬聲遙在白雲中

三

佛香寂寂石堂閒爲愛幽花未忍還
小摘園蔬堪共飽開窓落日滿西山

四

溪繞寒陂樹掩門茅茨曲曲映朝暎
鶉鳩立處沙隄白疑是江南水竹村

五

西嶺輕寒雪未消提壺選勝玉驄驕
淡烟古寺臨春水一半人家在畫橋

六

水邊人面映花紅上塚歸來倚岸叢
翠幄陰陰深不見遙聞笑語入東風

七
綠樹青帘傍女墻
壚頭少婦內家粧
遊人旣醉忘歸路
一道泉流帶夕陽

八

翩翩貂錦曉風吹
細馬香車夾道馳
舊日五陵多意氣
飛揚輸與弄珠兒

九

當日朱門邸第空
茫茫春草恨無窮
墓碑苔臥無人識
哭向寒烟野水中

十

畫樓高處故侯家
誰種青門五色瓜
春滿園林人不見
東風吹老海棠花

陳念蓋司馬召飲西郊雨阻不赴悵然有作
閒心欲共鷺鷗盟
何事泥途輟此行
好待山晴還一出
雙柑盡日坐聽鶯

春齋偶興

無事開軒坐殘春
倍可憐池塘青草夢
衣馬綠楊天杏雨
停遊屐松風穩晝眠
蕉林三徑啟不惜
買花錢

燕市

驄馬連錢白玉羈手携蘆管盡能吹青門薄暮飛塵
起驕煞長安輕薄兒

贈何誕登黃門

載石舟輕萬里餘夕郎近拜紫宸居歸從瘴海人
無恙宦就元龍氣漸除嶺表久稱循吏傳掖垣新頌
諫臣書迂疎鄉里慙先進賴有芳蘭足起予

祝諸暨余年伯雙壽

早年偕隱狎樵漁門掩青蘿讀異書荀氏弟兄于象
緯龐公夫婦愛山居傳經繞膝蘭芽茁課織高堂夜
月虛綸綉新頌雲五色春風鼓吹動鄉閭

送王止菴觀察之閩任

外臺執憲海隅偏把酒炎風悵別筵栢府霜清三尺
法榕城雨暗七閩天政平孝婦無冤獄波靜盧循罷
戰船知爾宦遊多遠畧十年名譽滿西川

春日劉淇瞻司馬召飲城南草亭同孫沚亭太
宰石仲生馮易齋兩少宰陳念蓋司馬朱右
君副憲劉魯一京兆

粲掃青蘿徑頻停白玉珂
林花迎劍珮水鳥奏笙歌
地僻人烟迥亭虛舞蝶多
主賓情不厭解帶欲婆娑

二

誰家好亭子宛似習家池
遊及風暄候心憐花落時
遠峯晴可數夕照坐頻移
此會爭能續停觴步履遲

三

一逕逶迤入林香撲袂來
波光翻藻荇山翠落樽壘
同是梁園客誰稱河朔才
風塵雙眼倦逸興爲君開

贈欽敘三還吳門

吳客扁舟落日昏春風襍
被布衣尊携來詞賦高京
洛歸去蓬蒿掩舊村抵掌
獨論千載事曳裾不傍五
侯門空囊賸有詩筒在潦
倒江干對酒樽

贈牟綠原山人還清源

牟生湖海客贈我嶺頭雲
顧筆蠶絲吐荀香鵲尾焚
解紛天下士長揖大將軍
春水青簾舫歸成五岳文
題劉淇瞻年兄畫扇

芳草芊芊間淺沙夕陽亭
子傍溪斜幽人不語看春
色一徑東風落杏花

贈田髯淵孝廉歸雲間

陰陰津樹孝廉船
愁擁詩囊落照前
我識謝莊當獨步
誰令越石讓先鞭
人歸烟雨江南棹
客散風雲薊北天
行矣著書三泖曲
漢廷終誦子虛篇

題沈仲顯小像

沈子鷄壇俠江湖
歲月深義爭高一
諾術屢致千金裘
馬塵中客烟霞物
外心觀君多智慧
蓮社可招尋

高粱橋

高粱橋畔水沖瀾
載酒行春歲歲同
朝士開元今幾

在蕭條垂柳夕陽中

種竹

窓下種瑯玕
時聞青玉響
一夕風雨生
身臥滄江上

清明郊行

西郊草色醉紅霞
柳外疎煙一徑斜
選地芳樽移野岸
遶村春水見人家
接離倒著山公酒
別業晴開杜曲花
高麓麒麟餘落日
那能對此負韶華

二

青鞵布襪踏春風
曉睨鶯啼樹樹紅
水滙御溝朝

關下山蟠王氣滿回中丹樓幻出伽藍記碧草遙連
碣石宮舊是傾都行樂地百年人醉茂陵東

題孫太宰泚園秋望圖

每有探幽興披圖見此園黃花霜後圃紅葉雨中村
水氣遙侵郭嵐光曉入門蒹葭秋色老采采欲忘言

二

太宰園何曠秋容面面收溪深山自靜心遠地偏幽
白鳥窺人起清泉傍塢流功成身退後垂釣不驚鷗

三

不盡秋山色結廬孝水濱棹歸孤舫月亭貯衆峯雲
遠渚懸魚笱平橋落雁羣主人高臥處是否草玄文

四

亂石通閒徑蕭蕭隱蟹庄才雖關社稷道自貴滄浪
千樹含秋雨雙峯縮夕陽何時憑杖屨烟水問茆堂

送白東谷年兄予告歸陽城

河梁抗手謝東華驛路陰陰柳幔斜執法舊聞天上
履采真今秘洞中砂清時耆舊容高蹈海內文章此
大家去國身輕真似葉臨岐語已帶烟霞

三
臣心如水並高名何事驪駒以病行種德自堪容駟
入急流真不負鷗盟陶公天與山林福疏傳人看祖
帳榮羨爾退身能及早棲遲獨愧縛塵纓

三

輕裝歸及太行秋酒熟花香樂事稠臥病文園多著
作謫官白傳自風流社開九老巾車入雲起千峯倚
杖遊八座還山猶黑髮可能棋墅久淹留

四

淄川少宰前年別王屋尚書今又歸京雒風雲朋輩
散梁園詞賦弟兄稀林中花落侵詩卷雨後溪清穩
釣磯數歎芳蘭多遠道追攀欲製芰荷衣

同門曹靜之登第

初薦賢書日師門立雪同廿年嗟晚達一戰借春風
駿骨高燕市凌雲奏漢宮勲名今讓子懶漫媿成翁

二

青雲多後進憐爾尚風塵放榜收佳士登科喜故人
艱難文價在淡泊素交親結綬年方壯清時好致身

喜劉子濬甥登第

科名傳奕葉汝又著先鞭終子稱奇對黃童正妙年
早燃藜杖火不貴洛陽田見說甥如舅今成宅相賢

魏辯若登第

詞場河朔早馳聲廿載難忘車笠盟 新主正思收
國士故人今始振科名鄭公遺笏台衡貴荀里占星
象緯明執憲中朝君介弟莫將青紫負平生

暑中遙憶鄉園秋色綴屬成詩以解煩悶

屋角青山出閒閒十畝存野花紛小徑秋水漲孤村

春粟隣家晚歸牛壟樹昏霜檐一鴈過黃葉滿柴門

夏日

午夢南窓栩栩琴書北牖蕭蕭怪底清風徐至簾前

雨滴芭蕉

二

暑雨蒼苔砌滿夕陽遠樹蟬鳴閉戶拋書獨坐落花

吹上桃笙

三

朝罷披襟高臥興來散帙焚香竹樹半窓影亂居然

烟雨瀟湘

四

掠水蜻蜓初去尋香蜂蝶旋來爲問紛紛何事紫薇
昨夜花開

高念東年兄書來却寄

思君遠道罷登樓吳會遙聞汗漫遊淮上有無生桂
樹桐江曾否問羊裘一樽歌吹雷塘月千里潮聲建
業舟何不求仙東渡海六朝花鳥祇關愁

二

功名脫屣傍漁磯白眼雲霄幾是非初意谿山供蠟
屐詎期子舍泣麻衣壺中丹藥何年就石上松風夙
願違他日投簪當過訪藕花深處好開扉

三

奏對欣看鳳羽賢宛如吾友致翩翩濟南童子西遊
日栗里先生獨臥年野服灌園携短杖輕舟弄笛倚
山泉書來猶帶烟霞氣讀罷清風倍洒然

七夕

雨後微涼至螢光入戶流漢宮仙露曉鄉夢藕花秋

久宦輕如葉新畬祝滿箒自傷余太拙不敢傍針樓

山雨樓圖歌

曾展沚園秋色圖又看樓閣倚芳湖細柳陰陰垂野
岸涼颼剪剪行菰蒲霜橋楓浦遙映帶山禽晨夕如
相呼斯樓構自何年始四時風物尚書里尚書雅望
裴王儔門庭澹寂心如水身依日月志岩扉家山繪
入丹青裏虛敞高樓天半開當窻遠岫何崔巍冥濛
海氣溪雲合蕭颯天風山雨來山雨滿樓秋氣爽飛
流瀑布山泉響主人高吟秋水篇客來時盪蘭舟漿

尚書退食寶此圖把卷示我同披賞尺幅宛移濠濮
間臥遊如立東山上漠漠亭臺入翠微 賜沐山公
許暫歸白雲紅葉迎孤棹茆堂沙徑生晴暉畫樓無
恙烟霞護如君家慶真難遇兩親老傍鹿門棲鳳毛
早擅凌雲賦舒嘯幽篁明月低稱觴絲管行雲駐三
徑雖高元亮風 九重雅重曲江度中朝人物待持
衡未容逸興盟鷗鷺久客子懷亦倦遊百尺思臥元
龍樓歲月蹉跎歸未得淒霜苦雨胡徧仄浩蕩秋風
起太行三復此圖興歎息

長安早秋

薊門烟樹影層層
客病鄉愁望裏增
忽覺西山來爽氣
秋風先到漢諸陵

秋日閒居

竹塢無塵短榻幽
蕭蕭涼雨下城頭
閉門休沐朝來懶
花落蟬鳴一院秋

二

露葵曉放兩三枝
試茗南窓日影遲
欲寄家書慵折簡
秋聲一片鴈來時

雨中同家兄昭性猶子承篤夜話

樹樹香飄葉葉風
聯床共話思無窮
家鄉秋老芙蓉墮
人在燕山夜雨中

秋夜

秋雨秋風滿上林
小堂秉燭影沉沉
長安萬戶寒衣早
多少人家在暮砧

二

耿耿星河秋夜長
銀屏桃簟送新涼
草堂初醒還家夢
隔檻風來茉莉香

雨夜

散帙清宵坐未休
陰蟲切切忽生愁
芭蕉綠暗紗窗濕
寒雨滿簾燈火秋

立秋

手挈銀燈照短莎
漢家城闕暮笳多
虛堂欹枕清如水
閒看秋星度絳河

二

高城一葉入寒流
暝色疎烟滿帝州
猶是千年燕嶠月
白雲不改漢宮秋

秋懷

疎桐露下苧衣涼
搗練聲催客思長
愁鬢那堪秋雨墮
一簾黃葉泣寒螿

二

女墻倒影水悠悠
哀角黃雲玉塞愁
朝市不知秋漸老
滿天風葉下蘆溝

三

羅雀門同處士家
篝燈秋影上窻紗
朝來大陸西風急
吹落家山萬樹花

四

晴階寂寂印苔痕
夢到韓溪水上村
睡起不知天已暮
疎鐘落葉月黃昏

五

擊筑悲歌事豈荒
狗屠名擅酒壚傍
蕭蕭易水人何處
衰柳寒潮下夕陽

六

市駿黃金客有無
燕昭臺榭入平蕪
千年禾黍高原在
風雨茫茫督亢圖

七

伊人渺渺隔蒼葭
碣石天高見落霞
自結短籬稱大隱
小門深閉一闌花

八

西苑秋風向晚多
芳湖錦纜事如何
池花落盡無人管
零亂鳧鷖出御河

九

魚塘菰岸水雲寬
可惜笙歌攪夜闌
何處空明秋色好
澹烟涼月在郊壇

竹風淅瀝思翛然危坐長吟秋水篇却憶家園田半
熟千村涼雨稻花天

輓范介五館丈

甬東家世集華簪何事文園渴病深鵬鳥賦成垂素
幔鶴鴒淚盡墮秋砧玉堂人憶山陽笛綠綺絃空子
敬琴歸櫬寒江楓葉落四明岫色晝陰陰

送王玉銘大司農葬親歸滇中

白首勲名八座歸清秋晝錦是麻衣洱西戰壘荆榛

滿南詔風烟故舊稀淚盡孤墳封馬鬣手披荒草認
漁磯 朝廷亟藉司農畫萬里春從鴈北飛

送子遠都諫省覲歸三原

薊門涼雨散御苑催寒砧之子賦歸歟揮手返舊林
芳醴陳清宵別緒胡蕭森子職在補闕五載勤規箴
上書皆讜言發論無刻深酒債日以多垂索空黃金
輕裝啓前途晨光來遙岑把袂上河梁車馬方駸駸
相看各二毛雁行忽商參人生若流萍去住隨浮沉
何以慰中懷有酒且重斟先世稱伯鸞高風垂古今

願言保令名勿忘平生心

二

秋草生古道芳時宜遨遊南山有敝廬禾黍滿平疇
久客自遠歸親戚擁道周家慶著萊衣絲管鳴啁啾
浩蕩荷 主恩烟壑恣夷猶歸人樂未央安知我心
憂重困念蒼生國計需良籌吾道方艱難疇堪砥中
流子才足救時寧能守巖丘佇期駕鋒車莫爲白雲
留

送孫沚亭太宰省覲歸益都

發發西風 賜沐年錦帆悵別潞河船共看鑑朗如
秋水獨好樓居似列仙八座趨庭山雨夜一樽橫笛
藕花天莫耽鱸膾家鄉美聽履 恩深北斗邊

秋日憶兩兄家園之樂賦寄

千頃玻璃萬樹蟬幽人夜傍水村眠客來載酒溪橋
上十里芙蓉月滿船

二

油油禾黍動平疇曳杖疏泉菡萏秋屋角片雲山市
夕溪風吹雨上村樓

三

午橋烟墅石苔斑黃犢車輕自往還風定鈴閒白鳥
下雨中臥對玉屏山

四

孤飛隻影逐風波兄弟登高事若何欲插茱萸興遠
思一天紅葉下滹沱

秋憶趙郡風物成雜咏三十首

千里桑麻暮靄中夕陽城郭下殘虹古來百戰遺荒
壘秋草茫茫王父宮

二

漠漠溪田接遠峰韓河雲黑鎖蛟龍水村烟雨無朝
夕十里黃昏聽暮鐘

三

聞說琅玕滿碧窓風枝雨葉響流淙空齋自長龍籬
大小圃全移入楚江

四

漁陽鼙鼓動邊陲留得常山千載祠秋到殿門燐火
暗時時陰雨見旌旗

五

黃金招客破齊歸卽墨謀成事已非舊恨興亡同劫
火望諸墓畔晚鴉飛

六

十里溪流遠市居綠波的的照紅蕖村翁刈稻歸來
晚菘葦烟中看打魚

七

城東別業輞川圖手種垂楊一萬株大麓經秋霜幹
冷綠烟猶似昔時無

八

霜飛河朔罷秋輦避暑亭荒暮草迷安得中山千日
酒楓林高臥醉如泥

九

趙璧重完志已諧澠池頸血濺庭階河山無恙人千
古顧盼風雲起壯懷

十

河北蕭王畧地來千秋王氣見高臺祇今遺廟荒烟
裏處處秋風紅蓼開

十一

信陵公子破強秦湯沐邑存歲月新多少平原門下
客鄙中不識賣漿人

十二

殘暑山村暖氣薰沙汀未到雁鴻羣涼颺一夕來蘋
末吹墮千峯大茂雲

十三

蕪蕪麥飯事堪論千古君臣重報恩河上秋風亭在
否蕭蕭黃葉有孤村

十四

檜栢經霜嶽色寒千年廟貌走祠官古碑苔蝕秋嘗
罷巖月松風冷石壇

十五

南越功成長百蠻尉陀荒塚枕空山英雄旣去同流
水樹樹秋聲倦鳥還

十六

風波滿地一漁船何必嚴陵勝冶泉策杖板橋楓葉
路弄簫鳧渚芰荷天

十七

秋城睥睨倚雲霄戰後中原霸氣銷夜雨空山行旅
過趙陵烟樹莽蕭蕭

十八

握手君臣在草茅一身是膽逞雄虬三分事業今黃
土故里秋風落燕巢

十九

平原風急雁行高白馬金鞭獵騎豪買醉旗亭新酒
熟邯鄲年少解弓刀

二十

北潭臺榭舊嗟峩絃管春風夕照多秋冷高原花自
落至今潭水不生波

二十一

高低秋壠帶平沙松菊猶存半畝斜最是芳菲春色
好青油幕護洛陽花

二十二

鴉滿疎槐古戰場白頭父老說興亡荒原野燒催寒
早萬里秋陰下太行

二十三

露冷蓮房秋水平
村墟日暮搗香杭
茅亭面面飛槐
雨一郡人家入鴈聲

二十四

池塘傍郭草青青
鳧鴨羣喧亂淺汀
曲折雕闌芳芷
發主人時綴護花鈴

二十五

青苔古刹塔峻嶒
貧盡開元寺裏僧
夜定鐘聲天半
落千家樓閣上寒燈

二十六

百尺千雲佛閣幽
諸天燈火梵鐘秋
憑闌忽墮滹沱
水落葉寒烟帶暝流

二十七

雕丘澹結草堂陰
烟水孤亭對碧岑
百尺老槐多歲
月夜深風雨作龍吟

二十八

清流繞堞碧鬢鬢
兩岸蒹葭映遠嵐
猶憶月明秋放
舸洞蕭吹過畫橋南



